



SERVISIO METEOROLÓGIKO ANTIANAN HULANDES I ARUBA

Seru Mahuma z/h, Kòrsou, Antianan Hulandes
Tel: +599 9 839.3366 Fax: +599 9 868.3999 E-mail: cur-met@meteo.an

KOMUNIKADO PA PRENSA

ÒKTOBER 2009: SIN ORKAN I SEKU

Òktober 2009 tabata un luna hopi trankil, pa loke ta trata siklon tropikal riba parti nort di Osean Atlántiko, Laman Karibe i Golfo di Mexico. Solamente dos tormenta tropikal a forma durante di e luna aki, di manera ku no tabatin ningun orkan.

Tormenta tropikal *Grace* a forma durante di anochi di 4 di òktober den un region no usual i esei tabata riba parti nort di Osean Atlántiko, nortost di Islanan Azores. E sistema aki despues a move den direkshon nortost i a debilitá denter di 24 ora, miéntras ku na mes momentu e tabata birando un sistema èkstra-tropikal, djis sùitwèst di Irlanda.

Tormenta tropikal *Henri* a forma durante di mèrdia di 6 di òktober riba parti wèst di Osean Atlántiko na un distansha di kasi 1000 kilometer ost di Islariba. E sistema aki despues a move den direkshon wèst nortwèst i a topa e mesun destino ku tormentanan tropikal Ana i Erika, algun siman promé den e temporada di orkan di 2009. Bou di influensha di bientu fuerte na nivel haltu, e sistema aki a debilitá, bira un depreshon tropikal i un dia despues, el'a práktikamente disolvé.

Áwaseru:

Ademas di ku tabatin tiki siklon tropikal den e region di orkan di Atlántiko, e kantidat di áwaseru na esepialmente Aruba i Kòrsou tabata bastante bou di e promedio pa luna di òktober. Na Kòrsou òktober tabata, ku solamente 23.1 mm na Aeropuerto Hato, mas o ménos 73% mas seku ku e promedio di hopi aña di 83.7 mm. Na Aruba, e sekura tabata ménos serio i einan e total pa òktober tabata 39.4 mm na Aeropuerto Reina Beatrix. E promedio pa òktober pa e sitio ei ta 65.0 mm, loke ta enserá ku einan e kantidat di áwaseru tabata 40% bou di e promedio di hopi aña.

Na Boneiru sin embargo e situashon di áwaseru tabata bastante variá. Den luna di òktober a kai lokalmente klaramente mas awa ku riba e otro dos islanan (Playa Pabou, 75.6 mm). Na Flamingo Airport, e kantidat di awa ku a kai tabata ku un total di 66.3 mm apénas dos porshento ménos ku e promedio di luna di 67.3 mm. Riba parti nort di Boneiru sin embargo a hopi ménos awa. Na Brasil (BOPEC) por ehèmpel a kai apénas 26.4 mm. Esaki ta mas o ménos un terser di loke a kai na Playa Pabou.

Motibu di e echo ku na mayoria kaminda a kai ménos awa ku kustumber mester wòrdu buská den presensha di un El Niño suak te moderá. E fenómeno aki, kaminda ku temperatura di laman den parti ost i sentral di Osean Pasífiko, den besindario di ekuatòr ta mas kalor ku normal, ta kousa entre otro un oumento di bientu na nivelnan haltu di atmósfera riba Área di Karibe. Esaki na vários okashon lo resultá den formashon di ménos nubia di áwaseru. Esaki na su turno ta kousa un temporada di áwaseru relativamente seku riba Islanan ABC.

Manera ta kustumber, na Islariba a kai mas áwaseru, pero aki tambe e kantidatnan total pa luna tabata ménos ku kustumber. Na Princess Juliana Airport (Sint Maarten) a kai durante di òktober un kantidat di 89.6 mm, loke ta 21% bou di e promedio p'e luna aki di 113 mm.

Perspektivanan pa áwaseru riba Islanan ABC entre di novèmber 2009 i yanüari 2010, komo konsekuensha di El Niño, ta desfavorabel pa sierto interesado. Último pronóstikonan ta indiká ku e chèns pa un temporada di áwaseru normal òf mas seku ku kustumber ta mas o ménos 75%. Pa Islariba ta antisipá ketu bai un kantidat normal di áwaseru den e mesun periodo aki. Perspektivanan preliminar ta indiká ku El Niño den di dos kuartal di aña 2010 lo kuminsá mengua gradualmente.

Manera ta kustumber, Servisio Meteorológiko lo sigui desaroyo di disturbionan tropikal ku hopi atenshon. Den kaso ku esei ta nesesario lo emití atvertensha na outoridatnan i pueblo di nos islanan.
